

EPEsos

Let town Pawl nilel vāgan tayakelesiys bikakins Yowbad nasiwāyoub avakaein, nivag dakasis ibwein, Yeisuw waseg. Kadilokena bitatoukums silmānin Yowbad nakaleiwag.

Nakabsilamaw

¹ Yey Pawl, takawein livānen Yeisuw Kelis yey; peinan Yowbad nanon māwan. Kalin nuwag tayakelesiys yakamiy, ven Epesos waseg nukus-esus, o kusimounids Yeisuw Kelis waseg.

² Tamads Yowbad son daGuyaws Yeisuw Kelis bisiwyoubumiy mo beitaw nuwamiy.

Kelis nasiwāyoub bwanabwein

³ Singaya ikalin nuwads Yowbad, daGuyaws Yeisuw Kelis taman; Yeisuw Kelis waseg, bo isiwyoubuds, isekeids libālab wuliyougwan kweitān kweitān, vāgan kululuwads bikatimweis bitawtoun.

⁴ Igaw-wan, nag ibun ven watinow, mo ikatigikeids Kelis waseg vāgan kid beivag adsinaps bwein, didumwal, siwāyoub, wamatan mtowen Yowbad.

⁵⁻⁶ Nanon townen bwanabwein waseg ilivnek vāgan bitamlavag nitun tatonen yakids, Yeisuw Kelis waseg, vāgan kid bitayakawanes nasiwāyoub townen singay avakaein, peinan Natun bwanabwein waseg ikalin nuwan yakids.

⁷ Natun buyāvin bo iwout peinads, niwidids adsinaps kalbaleb waseg; bo ikow adsinaps

kalbaleb, inow, ilavew. Peinan singaya avakaein nasiwayoub wasigeis yakids.

8-10 Nasiwayoub towen singaya avakaein, peinan ikatimweis adsinaps o nanouds mo itawtoun, mo takakins nanon tonen. Kweiboug nag takakins; nagein gog bo ikatiboug nuwads mo takakins nanon, peinan nilivnek Kelis waseg. Igaw nakabiyokous tut waseg mo youda babaw bilivkases Kelis waseg, takinew libalab youdanen o takinew ven watinow youdanen.

11 Kelis waseg, Yowbad inakiyay isekem yakamey, peinan ikatigikem nanon tonen waseg; peinan nawotet tut babaw mawana nanon tonen.

12 Wanmugwana yakamey nakasimounid Kelis waseg; Yowbad inakiyay bo isekem, vagan kid bakamlavag angamag, yakawanan tonen silmanin, o butun tonen silmanin.

13-14 Yakamiy-vak nukuliganes livan towen bwanabwein waseg ikatinabweids, nukusimounids livan towen mounid, livanen Kelis; mo Yowbad Kululuwan iwekeimiy mamagina amilivatawn, mawan yakamey, peinan bo ilivnek. Yowbad Kululuwan waseg bo ilivtuwanids, mapuna takakins dakiyays nises. Igaw mo bitakawes; o singaya bitakavasis inaguyaw waseg.

Pawl inanitoug

15-17 O yey, bo aligen nukusimounids daGuyaws Yeisuw waseg, o ikalin nuwamiy tasiyas tayakelesiys wasigeis. Aligen, mo ikalin nuwag yakamiy tut babaw waseg, o akavteg yigamiy yakamiy gunanitoug waseg Yowbad, mtowen Yeisuw Kelis

naYowbad, towen; o towen Tamads wanakaew. Aninitoug gog vāgan bisekeimiy non bwanabwein o bikatiboug nuwamiy mo bukukwakins mtowen Yowbad.

¹⁸⁻²⁰ Waninoumiy mo bukukwakins youd towen bwanabwein nikatigik igaw mo bisekeimiy, o bukunmises silmanin youd towen; e bukukwakins nakiyay singay bwanabwein towen nisekeids tayakelesiys yākids. E, bukukwakins natawtoun singaya avakaein wanuwads yākids tasimounids. Natawtoun towen waseg nivag Kelis, kanig waseg iyakit, in isin walbalab wanakatay waseg.

²¹ E, nakaleiwag walbalab bo ikow, ikaleiwag takaleiwag babaw wasigeis, o anelos bwanabwein o anelos kalbaleb wasigeis, o guyawaw babaw wasigeis; takinew tut towen waseg, o takinew tut wanakougwaw.

²² E, Yowbad bo isek Kelis nakaleiwag youd babaw wasigeis, mo imlavag datoveks, yākids tayakelesiys, vāgan kid bikaleiwag youd babaw wasigeis yākids.

²³ Peinan yākids nitamlavags mamagina won Kelis, mo ikadilok youd babaw wasigeis.

2

Kanig talisawes, mwamov tabānes

¹⁻² Yakamiy kweiboug mamagina takanigs yakamiy peinan amisinap kalbaleb o nukusiplaves Yowbad nakaleiwag, o peinan amisinap mamagina ven watinow sinapun, o peinan nukwanawes aygan takaleiwag towen

kalbaleb, bwagaw kweitan kweitan sitovek, o gamags-vak takapidabs sitovek.

³ O yakids kweiboug mawana tasiyas, advikeiys nikaliwageids, aveiyag wouds sivilan o nanouds. Kadiloka Yowbad bikamtanids mawana tasiyas.

⁴ Tage Yowbad, singaya inok nuwan yakids, o isiwyoubuds avakaein.

⁵ Yakids mamagina takanigs yakids peinan adsinaps kalbaleb, mo iyakituds sods Kelis. Bo ikatinabweids nasiwayoub townen waseg.

⁶ E, Yeisuw Kelis waseg iyamoveids mo isekeids idakaleiwags, vagan bitakaleiwags sods Kelis walbalab waseg.

⁷ Mapuna tut wanakougaw babaw gamag tut babaw mo bikakins nasiwayoub singay avakaein, peinan ikalin nuwan yakids, Yeisuw Kelis waseg.

⁸ Tasimounids waseg Yeisuw, mo Yowbad ikatinabweids, adsinaps kalbaleb waseg, peinan inok nuwan yakids. Ta-mawan bitakatinabweids tatoneids yakids, nag. Tage Yowbad nasiwayoub waseg.

⁹ Nag aveiyag tawtoun bitawteles mo Yowbad bikalin nuwan, bikatinabweids, nag. Bo isiwyoubuds mav. Kukin bikatinabweids peinan dawotets tawtoun, mo bitakaypamwes kid sinap. Awoum.

¹⁰ Yowbad bo iwotet wanuwads, Kelis waseg, silmanin adsinaps bwanabwein; Yowbad inawotet townen. Kweiboug nikatigik dawotets bwanabwein vagan bitawteles, nagein gog mo iwotet wanuwads.

Sods Kelis katanoka gamag yakids

¹¹ Kuninuways, tobwag ven gimgilis yakamiy. Min-Yudiy nimes waseg ibwabwes momwes, o idokeimiy tobwag gamag yakamiy, peinan ta-ivag anaboub momwamiy.

¹² Mitiyamun towen nag kukwakins Kelis, nag kukwakins Yowbad nakaleiwag min-Yisleil wasigeis, peinan tobwag gamag yakamiy. Bo ilivnek nasiwayoub wasigeis tasiyas; yakamiy nag. Kweiboug nag kunmises vagan Yowbad bilabeimiy; nag. Nag ivag miYowbad bwanabwein, nag.

¹³ Kweiboug kadiveiyov nukusesus, tage nagein mo nukusineikimas; peinan buyavin Kelis nei-wout pinamiy yakamiy, o pinem yakamey; mapuna yakamiy bo imayeimiy yakamey wadidem.

¹⁴⁻¹⁵ Mtowen Yeisuw mamagina niwal peinads yakids; yakamey min-Yudiy simayas vena babaw gimgilis yakamiy, bo tamlavags bod katanokwan. Won Yeisuw waseg bo igulek ablivis towen wanuweinids yakids; ablivis towen yagan kameiliw; mo iyakous min-Yudiy yakamey makaleiwag babaw, vagan biyakous bod kweitan, kweitan. Sivinan kid beivag katanoka bod, kweivaw bod yakids sods mtowen, mo bitamsamwas babaw yakids.

¹⁶ E, bo ikanig waklos vagan bukwawas simiy Yowbad yakamiy, o bakamwas simey Yowbad yakamey, mo bitamlavags bod katanok yakids; peinan anklos waseg bo ikatigulek sinap towen yagan kameiliw bo iyakous.

¹⁷⁻¹⁸ Mapuna mtowen bo isunap, igeiguy vagan kid kameiliw beikous; bo iguyeimiy yakamiy, kadiveiyov nukusesus, o iguyem yakamey,

kadiyakusan nakases. E, Yeisuw bilabeids mo bitanekes Yowbad, peinan Kululuwan katanokwan, mtowen imgwayeids babawa yakids mo tanekes Tamads Yowbad.

¹⁹ Kweiboug yakamiy mawana bwabwal o taggobwaws yakamiy; nagein gog nukumlavags Yowbad angamag simiyas tayakelesiys babaw.

²⁰ Yakids mamagina Yowbad nabunatum. Yeisuw Kelis kakolan tatonen; tasiyas takaweins livanen Yeisuw sisiyas tasiyas palopit mamagina siy; yakamiy gog wululay.

²¹ Kelis waseg takativaseids sidayas mo tamlavags bunatum katanokwan, o Yowbad ikayus nabunatum townen bwanabwein.

²² Yowbad Kululuwan ikativaseids mo tamlavags Yowbad nabunatum. Yakamiy-vak Kelis waseg, nukumeis silmanin bunatum townen, kwativases waseg.

3

Pawl nawotet ven babaw gimgilis wasigeis

¹ Mapuna akulul anitoug Yowbad waseg. Gunawotet bo isekeig silmanin tobwag ven gimgilis yakamiy, o nagein gog yey nases wadeil Yeisuw Kelis peinan.

² Adok bo kuliganes butun gunawotet, Yowbad nisiwyoubug nisekeig gunawotet townen, yakamiy pinamiy.

³⁻⁴ Yowbad ansinap to kweiboug nikiawum, nagein gog bo ikamtel waseg yey; mawana gunalet kakit nalel neiw; kuvinis mo kukwakins yey akakin sinapun Kelis, mawan yey akakin.

⁵ Tammwayas kweiboug nag ikakins sinap towen; tage tut towen, Yowbad Kululuwan bo ika-timlakes tasiyas takaweins livanen Kelis, sisiyas palopits mwasanin, mo ikakins.

⁶ Sinap towen mamagina, tobwag ven gimgilis yakamiy bweina bukukwawes Yowbad nakiyay; bweina bukuliganes livanen Kelis, bukukwawes aveiyag nikatigik peinads gamag yakids, o bukusiws Kelis aygan takaweins wasigeis.

⁷ Yowbad natawtoun waseg, bo isiwyoubug isekeig gunawotet vagan ballivan bwanabwein livan towen, livanen Kelis.

⁸⁻⁹ O yey mamagina toul yey, abus wasigeis tayakelesiys babaw; tage bo isiwyoubug isekeig gunawotet, ikayabeig aninoun tobwag ven gimgilis wasigeis allivan, alana, “Singaya Yowbad isiwyoubumiy, Yeisuw Kelis waseg”; vagan kid bukukwakins nanon towen tabunin youd babaw, Yowbad; peinan tut kweiboug tammwayas nag ikakins, nagein gog mo ikamtel wasigeis tayakelesiys yakids.

¹⁰ Nanon Yowbad mawan, vagan tasiyas takalleiwags kalbaleb wanakaew mo bikineids tayakelesiys yakids, tut nagein, mo bikakins Yowbad ansinap kweitan kweitan.

¹¹ Peinan nagwadiven nanon bo bikatinabweids yakids, min-Yisleil yakamey o tobwag ven gimgilis yakamiy, daGuyaws Yeisuw Kelis waseg.

¹² O Yeisuw waseg mo takapwapouts, bweina bitanekes Yowbad, peinan tasimounids Kelis waseg.

¹³ Kukwakins-wan peinan abag igeg pinamiy yakamiy; tage awoum bigeg ninoumiy, mo

bukugweys. Agumouvit townen silmanin bal-abeimiy yakamiy.

Kelis nasiwayoub singaya avakaein

¹⁴ Mapuna akulul wamatan Tamads.

¹⁵ Mtowen wawun kumwakum katanok katanok, takinew walbalab, o ven watinow; peinan Yowbad Tamads townen.

¹⁶ Anitoug Yowbad waseg Kululuwan bikim-tuweimiy yakamiy, inatawtoun waseg, bika-timweis kululuwamiy bukutawtouns; peinan daGuyaws Yowbad natawtoun singaya avakaein.

¹⁷⁻¹⁹ Anitoug vāgan bukusimounids waseg Kelis mo beisiw wakateimiy. Anitoug silmanin misiwayoub, vāgan bukusiwayoubs amisinap babaw waseg, simiyas Yeisuw angamag babaw, mo bukukwakins Kelis nasiwayoub, vakaeinan, vayovan, kopkohan. Nag bitalivans, peinan singaya avakaein, nasiwayoub townen. Anitoug māwan peinan sivinag Yowbad ansinap singaya avakaein bikatpilekeimiy mo bikadilokeimiy.

²⁰⁻²¹ Yowbad natawtoun singaya avakaein. Kukin aveiyag bitanitoug waseg, bo ikadilok gagaba waseg bisekeid; kukin aveiyag bitanuways, bo ikadiloka youd tasiyas, peinan wanuwads iwtuwotet; yakawanan townen bivakaein tayakelesiys wasigeis, Yeisuw Kelis peinan, gudwouvaws bimimeis tut nag beikous; yakawanan townen bo bisigeg. Eimen.

4

Woun katanok-wan

¹ Yey nases wadeil daGuyaws peinan, o yey aguyeimiy silmanin amisinap beibwein, peinan bo idaweids vagan bitanekes ansinap bwanabwein waseg.

² Awoum kwayapams, kadiloka kumanums-wan, kwaptuleimiy, kusiwayoubs o kuvnases simiyas.

³⁻⁴ Kutawtouns vagan bukusesus ninoumiy katanok-wan, Kululuwan Yowbad waseg, mamagina bod katanok, niwal waseg woun katanok-wan, son Kululuwan-vak katanok-wan. Bo idaweids vagan danamis bitaseinis katanok-wan.

⁵⁻⁶ DaGuyaws gog anmwānet, dasimounids katanok, o dakabaptays katanok-wan; Yowbad anmwānet, babaw yakids Tamads, Takaleiwag youda babaw wasigeis, Tabunin youda babaw; e, youda babaw wasigeis nises.

⁷ Bo isiwyoubuds katanok katanok yakids, mamagina Kelis ivgen isekeids.

⁸ Livan nises mamagina:

“Mitiyamun neimwen nein wanakaew, bo iyous antameiliws babaw, itokes inawes nakabkaleiwag waseg, mo ivgen nasiwayoub inagamag wasigeis.”

⁹ (Silawun livan townen: ‘Beimwen bein wanakaew,’ peinan wanmugwana neibus neim watinowa singay.

¹⁰ Mtowen neibus neim, wankuyeim mo imwen ilisow libalab in-o wanakaewa singay; mo ikadilok ven babaw wasigeis, vagan bisesuna bikalileiwag.)

¹¹ Nasiwayoub itam gamag wasigeis, sinap ikatipel isekes mawana, mwasanin imlavags

takanaweins aygan, mwasanin palopits, mwasanin takaweins livan bwanabwein, mwasanin tamtakavateins alen, mwasanin takatimlakays.

¹² Vagan kid bikimtuwes tayakelesiys bitaw-touns silmanin nawotet o bikatimweis Kelis won bitawtoun.

¹³ Mo bivag dasimounids bimlavag katanok-wan, babaw yakids; nanouds katanok, bitakakina-wan Yowbad Natun; adsinaps bo bikadilok, mamagina Kelis ansinap tonen, peinan ansinap ikadiloka youda babaw wasigeis.

¹⁴ Kweiboug adsinaps mawana gamagals, nitaliganes takatidividavs sikaleiwag kweitan kweitan mo isunasun nanouds. Nagein gog bo imatuw adsinaps.

¹⁵⁻¹⁶ Tut nagein adilivans mounid, siwayoub waseg, ikatimweis adsinaps mo imatuw, mo tanekes datoveks Kelis, mamagina kunun waseg tayakelesiys yakids, o yakids mamagina won tonen, antuvas babaw wasigeis, o won wuliyoug-wan katanok katanok yakids, tamlavags woun katanok mo iwotet bwein, ikatimweis siwayoub waseg, mo ivakaein.

Adsinaps kweiboug o kweivaw

¹⁷⁻¹⁸ DaGuyaws waseg gunakaleiwag mamagina, “Awoum beivag amisinap mawana tasiyas tadadubs.” Ninous makava dadub; nag ikakins mwamovan Yowbad, peinan kates keikay mo ibol ninous.

¹⁹ Nag ivag asimwasin wamatan Yowbad; sivines kid sinap singay kalbaleb o bikibik, bipwakits waseg.

20 Tage Kelis nag ikatimlakeids sinap mawan.

21 Adok townen waseg nukuliganes sinapun Yeisuw; kusimounids ansinap moundid waseg.

22 Mapuna townen, kadiloka kupiyaves sinap kweiboug kalbaleb; peinan vikeiyan iyagageimiy; o ikatidev ninoumiy.

23-24 E kweiboug sinap kupiyaves, kuninuways gog sinap kweivaw mo bukumlavags mamagina kweivaw gamag yakamiy; amisinap mawana Yowbad ansinap moundid o didumwal.

Sinap kweivaw inakaleiwag

25 Kadiloka kupiyaves livan yaweid; tage bukulivans moundid wasigeis simiyas, peinan babaw yakids wuliyougwan Kelis yakids.

26-27 Kukin bikapasal nuwam, awoum beivag amsinap kalbaleb. Awoum biveiyov mukwawikun. Awoum kwavvikuna ee... beiboug; awoum. Awoum kutam Seitan nakaleiwag waseg.

28 Tavveinaw, kadiloka bipiyev sinap kalbaleb; tage naman waseg bweina biwotet beibwein mo biban inawotet anagin, vagan mo bivagein bisekes tasiyas tasimavs.

29 Awoum livan kalbaleb bisinap wawdoumiy, awoum. Misinaka livan bwanabwein bukulivanes vagan tasiyas tanganegs bikatimweis asisinap bivakaein, mo bitawtouns, mawan sivines.

30 Awoum bukuyagages nanon Yowbad Kululuwan Townen Bwanabwein. Mtowen waseg, Yowbad bo ilivtuwanids yakids, vagan bitakakins igaw mo bikatinabweids.

³¹ Kupiyaves sinap kalbaleb; awoum dibamiy bimouvit; awoum bukwavikuns, awoum bika-pasal nuwamiy, awoum kutawyages simiyas.

³² Tage kadiloka kusiwayoubs beibwein, bikalin nuwamiy simiyas wasigeis, igaw simiyas biyablebeimiy, kadiloka kunumlaves, peinan Yowbad, Kelis waseg, bo inumlev amisinap kalbaleb yakamiy.

5

¹ Peinan Yowbad isiwyoubumiy mamagina nitun yakamiy, kadiloka beivag amisinap mawana Yowbad ansinap tatonen.

² Tut babaw kusiwyoubus simsimiyas, peinan Kelis bo isiwyoubuds, bo itam won tonen, mamagina lun bulukwan; o nasiwayoub townen manisin bwanabwein, silmanin Yowbad bikalin nuwan.

³ Peinan Yeisuw angamag yakamiy, awoum teitan gamag bikin sinap kalbaleb wasigeis yakamiy; awoum bukusubwans; awoum kumtimwamons; bikibik sinap babaw kupiyaves, peinan Yeisuw angamag yakamiy.

⁴ Awoum kwammugwals; awoum kubbasims; awoum kullivans mav, simiyas geg ivag asimwasin, awoum. Tage amilivan bukulivans sona kakalin nuwamiy Yowbad waseg.

⁵ Kadiloka kukwakins tasiyas takalbaleb nag beisiws nakabkaleiwag Kelis son Taman, nag. Tassubwans nag, tabbasims nag, tamtimwamons nag. Tasiyas tamtimwamons ivages mamagina siyowbad tobwag.

Kumlavags kamnat gimgeilin yakamiy

⁶ Gamag mwasanin makava illivans; idokes kid bikatidavimiy; awoum bukuliganes asilivan; awoum. Tasiyas gog tapiyaveins Yowbad nakaleiwag, issubwans o ikayylas, o ibbasims o imtimwamons; igaw Yowbad mo bikamtanis gamag tasiyas.

⁷ Kadiloka kusinales gamag tasiyas.

⁸⁻⁹ Kweiboug tadadubs yakamiy; tut gog townen daGuyaws waseg mo nukumlavags kamnat gimgilis yakamiy. Kadiloka amisinap kamnat waseg bukuninouas; peinan kamnat anagin mamagina sinap bwanabwein, o didumwal, o mounid.

¹⁰ Kunineivs amisinap bwein, aveiyag daGuyaws nikalin nuwan waseg.

¹¹ Kadiloka bukupiyaves sinap dadub; peinan anagin nag ibwein, nag; kadiloka bukusiwbwades sinap townen.

¹² Tasiyas asisinap singaya kalbaleb, bo ikawumes. Livan bitaliganes mo beivag admwasins.

¹³ Aveiyag bimteil sinap babaw vagan bitakines bwein o kalbaleb? Adok kamnat tatonen.

¹⁴ Kukin bimteil mo bitakinbunikes. Livanen nises mamagina:

“Kukit tammasis yakoum,
Takanig yakoum kutamanaw,
Kelis mo bimteilim yak.”

¹⁵ Mapuna kuvnaseimiy vagan beibwein amisinap; awoum kusimavs mawana tablabols yakamiy; kadiloka kusinaps beibwein.

¹⁶⁻¹⁷ Tuta babaw kuwtuwotets beibwein; awoum kusimavs mawana patabods yakamiy;

peinan tut towen kalbaleb; kadiloka kuninuways daGuyaws nanon, mo bukuvages mawan.

18-19 Awoum kumwamwes wayn mo bukwablaweins; bukumwamwes adok biyagageimiy; tage Kululuwan Yowbad bikadilok wasigeis yakamiy, mo beitam amilatas, bukwaweles amiwous vagan simiyas beinegs; bukwaweles, bukuyakawns daGuyaws waseg; e, bukwaweles sam o wous tapwaloul, o kweivaw wous-vak bukuwutus, peinan Kululuwan bikatimlakeimiy.

20 Tut babaw bikalin nuwamiy Tamads Yowbad waseg, silmanin youda babaw; daGuyaws Yeisuw Kelis peinan.

21 Kadiloka bukutameimiy simsimiyas wasigeis, peinan kugoulus Kelis.

Livnen veivay kudataw son kudavin

22 Vinay yakamiy, kutams mimwanas sikaleiwag waseg, mawana nukutams daGuyaws waseg.

23 Peinan Kelis takaleiwag tayakelesiys yakids wasigeis; mawana kudataw bikaleiwag nakwav waseg. Kelis ikatinabweids tayakelesiys yakids, mamagina won tatonen.

24 Kadiloka vinay beitams simwanas sikaleiwag katanok katanok waseg, mawana yakids tayakelesiys tatams Kelis nakaleiwag waseg.

25 Tawaw yakamiy, kadiloka kusiwyoubus mik-wavas, mawana Kelis nisiwyoubuds tayakelesiys yakids, mwamovan tatonen itam peinads.

²⁶⁻²⁷ E, ikayuseids, sinap bwanabwein silmanin; anilivan waseg bo iwidids yevagam waseg; sivan kid yakids bitakamnats, bitamlavags angamag tonen yakids, nag aveiyag kalbaleb ankakin wasigeis yakids, peinan sivan adsinaps bwanabwein o kamnat tatonen.

²⁸ Kadiloka tawaw bivnases sikwavas, mawana tasiyas wous tatineis. Kukin kal bivnas nakway, mawana bo ivnas tatonen.

²⁹⁻³⁰ Ta-kal bikamliw won tatonen, nag; tage ivnas won, ituy; mawana Kelis nivnaseids tayakelesiys yakids, peinan yakids mamagina won tatonen.

³¹ “Mapun-vak taw bilisow inan o taman, mo bilatans son nakwav; tasiyas asteiy mo bmlavags woun katanok.”

³² Livan towen tawtoun, mamagina kabebay, livanen Kelis siney tayakelesiys.

³³ Tage kadiloka tatanok tatanok yakamiy bukusiwyoubus mikwavas, mawana nukusiwyoubumiy tatineimiy; kadiloka mikwavas bigoulumiy yakamiy.

6

Gamagal sisiy timsiyas

¹ Gamagal yakamiy, kadiloka kwanawes inmiyas o timmiyas ages, vagan amisinap beibwein.

²⁻³ Wanmugwana Yowbad isek nakaleiwag towen vagan bitaliganes mo bisiwyoubuds; nakaleiwag mamagina:

“Kuvnas tamam inam, mo bukusesus bwein, mukwasis biveiyov ven watinow waseg.”

⁴ Tawaw yakamiy, awoum kuyamwages nitimiyas, tage kuyadumwalus, kwatimlakes daGuyaws ansinap o nakaleiwag.

Kunvases mituwaveks

⁵⁻⁷ Tawwotets yakamiy, kwanawes mituwaveks ages ven watinow waseg, kugoulus beibwein. Awoum bisisiyuw ninoumiy; tage bukuvnases tasiyas, mawan nukuvnases Kelis. Kukin gog nag, adok bukuwotets wamatan mitovek, tage kukin binoun mo bibgumat woumiy. Tage yakamiy kadiloka bukutoukums mituwaveks siwotet waseg, peinan Kelis natouwat yakamiy, kutames ateimiy silmanin Yowbad nakaleiwag. Mapuna kutams mituwaveks siwotet waseg; bi-seiw nuwamiy, mo bukuvages beibwein; peinan mamagina daGuyaws nawotet tonen.

⁸ Kadiloka bukukwakins daGuyaws bisekeimiy maysamiy, miwotet bwanabwein silmanin, takinew touwat yak o takinew tamwey yak.

⁹ O magat situwawek yakamiy, yakamiy-vak kuvages amisinap beibwein; awoum kukwanans, kuninuways mitovek anmwānet nises walbalab, nakaleiwag katanoka ivkek wasigeis tasiyas mitouwat o wasigeis yakamiy. Bo bikaliwageimiy māwana tasiyas.

Naviy wuliyougwan silmanin Yowbad nawotet

¹⁰ Livan babaw bo ayakous, kweitan nises mamagina, simiy daGuyaws bukulavags tatawtoun yakamiy, peinan mtowen natawtoun singay-wan.

¹¹ Naviy youdanen Yowbad bisekeimiy, kukwawes mo bukutakayways Seitan ansinap waseg.

12 Yakids nag bitakanaviys wasigeis gamag, nag; tage takanaviys wasigeis bwagaw tasiyas mamagina baloum o yeiluw, takaleiwags tasiyas tadadubs, mamagina anelos kalbaleb tasiyas.

13 Kadiloka bukukwawes naviy youdanen meivek-wan Yowbad nisekeimiy, igaw tut kalbaleb waseg bukutawtouns ee... mo bukutakayways.

14-15 Kadiloka bukutamanaws, amiwat yagan sinap mounid; sinap didumwal kuvaligaves wavtikoumiy; misandol mamagina livanen Kelis, niwal silmanin; beisiw wanuwamiy livan townen.

16 Bukukimgrayes mikawlawal bisilbwed woumiy, townen yagan simounid Yeisuw waseg, vagan mtowen takalbaleb nakayal bukuyoubwis meivek-wan.

17 Amitanugweib naviy silmanin, yagan katuneib; Yowbad Kululuwan napulut kukwawes yagan Yowbad anilivan.

18 Yowbad Kululuwan bilabeimiy mo bukunitougs tuta babaw. Nitoug silmanin kadiloka bukutoukums, kuvvaluts, kugilagels vagan Yowbad bilabes tayakelesiys babaw.

19-20 E, kunitougs peinag yey, vagan Yowbad bisekeig sinap, bakapwapout baggeiguy wasigeis gamag, vagan bikakins livanen Kelis bwanabwein, to nikamtel wasigeis yakids. Livan townen nakakokew, silawun to niyousigs nisenags wadeil, tage ikadiloka bakapwapout livan townen waseg.

Kalin nuwag yakamiy

²¹⁻²² Bo akayeb bwadads Tikikos neiw, vāgan bisekeimiy livāneig gunakasis waseg, o gunawotet livānen, youda babaw mo bikamtel wasigeis yakamily. Taw towen bwadads bwanabwein, daGuyaws inawotet waseg itakum; livnem yakamey bisekeimiy vāgan bikimtuweimiy mo bukutawtouns.

²³ Tamads Yowbad son daGuyaws Yeisuw Kelis bisiwyoubumiy, budimayas yakamiy, vāgan bukusimounids beibwein mo beitaw nuwamiy.

²⁴ Kalisiy yakamiy nag bukutineilovs daGuyaws Yeisuw Kelis waseg, Yowbad bo bisiwyoubumiy beibwein.

KALEIWAG KWEIVAW
The New Testament in the Muyuw Language of Papua
New Guinea
Nupela Testamen long tokples Muyuw long Niugini

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 9 Oct 2020

517ae3da-6769-54e8-8afd-7d53f958558c